



ADMINISTRACIÓN LOCAL

MUNICIPAL

FERROL

Negociado de Educación

Bases que rexerán a convocatoria pública de axudas para transporte diario de estudantes universitarios/as de Ferrol ás facultades da Universidade da Coruña nos Campus da Coruña. Bono bus universitario cursos académicos 2022-2023 e 2023-2024

ANUNCIO

Con data do 29 de setembro de 2022, o Excmo. Concello Pleno de Ferrol, aprobou as bases específicas que rexerán a convocatoria pública de axudas para o transporte diario de estudantes universitarios/as de Ferrol ás facultades da universidade da Coruña nos campus da Coruña e viceversa . Bono bus universitario cursos académicos 2022-2023 e 2023-2024 que a continuación se transcriben:

BASES QUE REXERÁN A CONVOCATORIA PÚBLICA DE AXUDAS PARA TRANSPORTE DIARIO DE ESTUDANTES UNIVERSITARIOS/AS DE FERROL ÁS FACULTADES DA UNIVERSIDADE DA CORUÑA NOS CAMPUS DA CORUÑA. BONO BUS UNIVERSITARIO CURSOS ACADÉMICOS 2022-2023 E 2023-2024 (35 BOLSAS POR CURSO).

1.- OBXECTO

As axudas para bono-bus universitario teñen como finalidade subvencionar o desprazamento diario, ida e volta no mesmo día, de 35 veciños/as do Concello de Ferrol, matriculados/as nas diferentes Escolas ou Facultades da Universidade da Coruña, nos Campus da Coruña que teñan ou cumpran os 21 anos de idade durante o curso (ou no seu defecto a idade máxima establecida pola Xunta de Galicia para a aplicación da tarxeta XENTE NOVA. Toda vez que a dita tarxeta implica a gratuidade do transporte público interurbano entre calquera punto de Galicia, as persoas que están no ámbito subxectivo da dita tarxeta quedan fóra do ámbito subxectivo das presentes axudas, xa que coa mesma os ditos desprazamentos son gratuítos).

Como queda indicado o número de bolsas máximo por convocatoria serán 35.

2.- PROCEDEMENTO DE CONCESIÓN

A concesión destas axudas efectuarase en réxime de concorrencia non competitiva, con suxeción ao establecido na Lei 38/2003, de 17 de novembro, Xeral de Subvencións, no R.D. 887/2006, de 21 de xullo, regulamento que a desenvolve, e na Lei 9/2007, de 13 de xuño, de Subvencións de Galicia, e co límite orzamentario dispoñible.

3.- ORZAMENTO ECONÓMICO

3.1.- As axudas que se concederán en cada convocatoria imputaranse á aplicación orzamentaria 05003-3263-48000.

3.2.- A percepción de axuda municipal do bono bus universitario é compatible coa percepción doutras subvencións ou axudas, públicas ou privadas, que o/a beneficiario/a obteña para a mesma finalidade, sempre que o seu importe xuntamente co da axuda municipal, non supere en ningún caso o custo total da actividade subvencionada.

4.- BENEFICIARIOS/AS

Os/as beneficiarios/as desta axuda serán os/as estudantes veciños/as de Ferrol, que figuren matriculados/as na Universidade de A Coruña, nos campus de A Coruña, sempre que así o soliciten e figuren empadroados/as en Ferrol, durante todo o curso académico para o que soliciten a axuda, non superen os umbrais de renda que se establecen nas bases e cumpran as condicións da convocatoria e teñan ou cumpran os 21 anos de idade durante o curso (ou no seu defecto a idade máxima establecida pola Xunta de Galicia para a aplicación da tarxeta XENTE NOVA)

O incumprimento de calquera destes requisitos suporá a perda do dereito a percibir a bolsa concedida.

5.- LUGAR E PRAZO DE SOLICITUDE

As solicitudes se presentarán no Rexistro Xeral do Concello, conforme ao modelo oficial facilitado polo Concello, na súa sede electrónica ou por calquera outro dos medios previstos no art. 16 da Lei 39/2015, de 1 de outubro, do Procedemento Administrativo Común das Administracións Públicas. O prazo de presentación de solicitudes será de 10 días hábiles a contar dende o día seguinte ao da publicación da convocatoria no Boletín Oficial da Provincia.

No caso de traslado forzoso poderán solicitar a axuda fóra do prazo, coa previa xustificación documental do traslado.

6.- DOCUMENTACION A APORTAR POLO/A SOLICITANTE

Á solicitude, segundo modelo oficial facilitado polo Concello, deberá acompañarse de:

1. Fotocopia cotexada do DNI ou NIF do/a solicitante.
2. Fotocopia cotexada do resgardo de matrícula do curso correspondente á convocatoria do bono bus universitario, e da tarxeta de estudante.
3. Fotocopia cotexada da Declaración da Renda de tódolos membros da unidade familiar. No seu defecto, certificación de ingresos anuais da Seguridade Social (no caso de pensionistas), ou do Servizo Público de Emprego-SPE (no caso de desempregados/as).
4. Declaración responsable de que os ingresos da unidade familiar no presente exercicio non se incrementaron respecto dos reflectidos na/s declaración/s da renda presentada/s. En caso contrario, acreditación dos ingresos reais do presente ano.
5. Declaración responsable de non recibir bolsa ou axuda para o mesmo concepto ou da súa percepción, no seu caso, con indicación da procedencia, concepto e contía.
6. Declaración responsable de estar ao corrente coas obrigas tributarias (Estado, Comunidade Autónoma e Concello), e coa Seguridade Social, así coma non ser debedor de obrigas por reintegro de subvencións.
7. Declaración responsable de non estar incurso nas causas de incompatibilidade ou incapacidade para ser beneficiario/a ou percibir axudas da Administración, previstas no art. 13 da Lei 38/2003, de 17 de novembro Xeral de Subvencións.
8. Autorización ao Concello de Ferrol para realizar as consultas necesarias do Padrón municipal co obxecto de verificar o requisito do empadronamento en calquera momento do curso académico.

7.- CRITERIOS DE CONCESIÓN

O criterio de valoración será que a unidade familiar da persoa solicitante non supere os seguintes límites máximos de base imponible por unidade familiar:

Núm. de membros da unidade familiar	Límite máximo de base imponible por unidade familiar
1 ou 2	20.500,00 euros
3	22.500,00 euros
4	24.500,00 euros
5	26.500,00 euros
6	28.500,00 euros
7	30.500,00 euros
8	32.500,00 euros

Cando sexan dous irmáns os/as usuarios/as do bono bus, o/a primeiro/a deles/as terá dereito á bonificación, mentres que para o/a segundo/a outorgaráselle sempre que a base imponible por unidade familiar non supere os 35.500,00 euros.

No caso de familias que teñan tres ou máis fillos/as cursando estudos universitarios, todos/as aqueles/as que utilicen o bono bus terán dereito á bonificación, sempre que a base familiar non supere os 50.500,00 euros.

No suposto de que unha vez aplicado o anterior baremo ás solicitudes presentadas o número de bolsas asignadas non chegara a 35, concederanse as restantes ata chegar a este número por orde de menor a maior ingresos. En todo caso, non se concederá ningunha bolsa cando a base imponible da unidade familiar supere o dobre das cantidades indicadas no parágrafo primeiro.

No caso de que as condicións económicas varíen con respecto ao ano anterior ou de se producir casos extraordinarios dentro das unidades familiares, deberase informar destas circunstancias para o seu estudo e no seu caso valoración da procedencia do mantemento, concesión ou revogación da axuda do bono bus.

8.- DEFINICIÓN DE UNIDADE FAMILIAR ÓS EFECTOS DE BONO BUS. MEMBROS COMPUTABLES.

8.1.-Para o cálculo da renda familiar serán membros computables da familia o pai e a nai, o titor/a ou persoa encargada da garda e protección do menor, no seu caso; o solicitante, os irmáns solteiros menores de 25 anos e que convivan no domicilio familiar ou os de maior idade, cando se trate de persoas con discapacidade, así como os/as ascendentes dos pais que xustifiquen a súa residencia no mesmo domicilio que os anteriores co certificado municipal correspondente.

No caso de solicitantes que constituían unidades familiares independentes, tamén se considerarán membros computables o cónxuxe ou, no seu caso a persoa a que estea unida por análoga relación (sexa parella de feito rexistrada ou non) así como os/as fillos/as se os houbese que convivan no mesmo domicilio.

8.2.-No caso de divorcio ou separación legal dos pais non se considerará membro computable aquel deles que non viva co/ca solicitante de bolsa. Non obstante, no seu caso, terá a consideración de membro computable e sustentador/a principal o/a novo/a cónxuxe ou persoa unida por análoga relación cuxas rendas e patrimonio incluíranse dentro do cómputo da renda e patrimonio familiares.

Cando o réxime de custodia dos/das fillos/as sexa o de custodia compartida consideraranse membros computables o pai e a nai do solicitante, os/as fillos/as comúns e os/as ascendentes do pai ou da nai que xustifiquen a súa residencia no mesmo domicilio que os/as anteriores co certificado municipal correspondente.

8.3.-Nos casos nos que o/a solicitante alegue a súa emancipación ou independencia familiar e económica, calquera que sexa o seu estado civil, deberá acreditar documentalmente esta circunstancia, e que conta cos medios económicos propios suficientes que lle permitan a súa independencia así como a titularidade ou aluguer do seu domicilio habitual.

En caso contrario, e sempre que os ingresos acreditados resulten inferiores aos gastos soportados en concepto de vivenda e outros gastos considerados indispensables, entenderase non probada a independencia polo que para o cálculo da renda e patrimonio familiar a efectos de axuda ao transporte computaranse os ingresos correspondentes aos membros computables da familia a que se refiren os apartados 1 e 2 deste artigo.

9.-ORGANOS COMPETENTES PARA A INSTRUCCIÓN E RESOLUCIÓN DO PROCEDEMENTO

A concesión ou denegación das axudas aprobarase mediante resolución do concelleiro delegado da Área de Cultura, Educación, Universidade, Deportes e Festas, previo informe da Comisión de Valoración e da proposta motivada do negociado de Educación e Universidade.

A Comisión de Valoración estará formada por:

- O concelleiro delegado da Área de Cultura, Educación, Universidade, Deportes e Festas.
- A xefa do negociado de Educación e Universidade.
- A técnica de Educación.

O prazo máximo para resolver será de tres meses a partir da data de solicitude, agás que sexa necesario requirir datos aos solicitantes, e se suspenda o procedemento por tal causa, nos termos establecidos no art. 22 da Lei 39/2015, de 1 de outubro, do Procedemento Administrativo Común das Administracións Públicas.

Transcorrido este prazo sen que se dite resolución expresa, o solicitante poderá entender desestimada a súa petición.

10.- CONTÍA E PRAZO DE XUSTIFICACIÓN DOS GASTOS PARA O PAGAMENTO DA AXUDA

O pago destas axudas realizarase mediante unha bonificación, ó/á beneficiario/a, do 50% do importe do bono no traxecto Ferrol-A Coruña-Ferrol, correspondente aos períodos de clases sinalados no calendario oficial da Universidade da Coruña, previa presentación das facturas dos bonos ou documentos de valor probatorio equivalente no tráfico xurídico mercantil ou con eficacia administrativa, como certificación expedida pola empresa de transporte que reflecta os bonos comprados con indicación do mes e importe, así como o nome, apelidos e DNI do /a estudante nos seguintes prazos:

Curso 2022-2023: Ata o día 31/12/2022 o 50% do importe dos bonos de setembro a decembro de 2022 e ata o 31 de xullo de 2023 o 50 % dos bonos de xaneiro a xullo de 2023.

Curso 2023-2024: Ata o día 31/12/2023 o 50% do importe dos bonos de setembro a decembro de 2023 e ata o 31 de xullo de 2024 o 50 % dos bonos de xaneiro a xullo de 2024.

Unha vez resoltos os expedientes, o negociado de Educación e Universidade remitirá á Universidade de A Coruña a relación de beneficiarios/as, para que realicen as comprobacións que estimen oportunas e o posterior pagamento da súa porcentaxe ó Concello de Ferrol, en virtude do convenio asinado a tales efectos.

11.- RECURSOS

Contra a concesión ou denegación das axudas reguladas nas presentes bases poderá interpoñer o recurso potestativo de reposición ante o órgano que a dictou dentro do prazo dun mes contado a partir do día seguinte ao da súa notificación, de conformidade co disposto nos artigos 123 e 124 da Lei 39/2015, do 1 de outubro, de procedemento administrativo común das Administracións Públicas. Todo isto, sen prexuízo da posibilidade de interpoñer directamente o recurso contencioso administrativo ante o Xulgado do Contencioso Administrativo, dentro do prazo de dous meses contados a partir do día seguinte ao da notificación desta resolución e na forma prevista no artigo 46 da Lei 29/1998, do 13 de xullo, reguladora da Xurisdicción Contencioso Administrativa (BOE 14.07.1998).

12.- PUBLICACIÓN DAS BASES

As presentes bases publicaranse na páxina web do Concello de Ferrol (www.ferrol.gal) e na Base de Datos Nacional de Subvenciones.

Ferrol, 30 de setembro de 2022.

O concelleiro delegado da Área de Cultura, Educación, Universidade, Deportes e Festas

Antonio Golpe Díaz

2022/6095